



集諸法寶最上義論

宋西天三藏朝奉大夫試光祿卿傳法大師施護奉
詔譯

集諸法寶最上義論



清刻龍藏佛說法變相圖

集諸法寶最上義論

上下卷

星一

善 寂 菩 薩 造

宋西天三藏朝奉大夫試光祿卿傳法大師旌護奉 詔譯

歸命一切佛歸命諸法藏頂禮一切智廣大

甚深理我今造論名曰寶上是諸法中最上

真實決定勝義論星一曰若人若天及諸情類從

無始來癡暗為因有語言道是惡趣根若有

樂入彼一切智清淨界者是故歸命佛曰光

明此中云何所謂離我等性及一切因當知

一切煩惱業生雜染等法無初無住而無實

體雖有所生與夢幻等如夢幻故從分別起

當知諸法皆從緣生是故諸佛緣生義中宣

說諸法諸物性空空無自性而亦不應於中

作無實想是故清淨阿賴耶識雖有所受而

無所著此義甚深又復廣大諸經教中皆如

是說諸有樂欲求解脫者應當如實覺了諸法當知諸法不離於識若離識者是性即斷是故法中無實有性法集經中作如是說若法是實若法不實若有自性若無自性是二不應將幻喻等諸法非有性而亦非無性此中所說若實無性無性名空空即成斷若實有性是性爲常當知言空與非空異離空非空亦無所得又如明暗二不相合離暗離明俱無所得是故應知此中所說明不現前暗云何離智之與愚二不相合離智離愚亦無所得非智非愚是二中間我想皆空彼一切法無內無外亦無中間無法可取無法可捨寶積經中作如是說若說言有此爲一邊若說言無是爲二邊若一若二若彼中間皆無有相而不可見無相見故亦不可說無形無

像不可表示無種類法無所攝藏亦非中邊有所安立此中所說是真實說性與無性本來如是作此解者真觀聖諦能離貪等煩惱過失設復煩惱有所生起於聖諦中而無所著若如是知如是解者即得如來功德聚身星一作師子吼轉大法輪普令一切皆悉見聞楞伽經中作如是說我語無相而不可取轉識經中作如是說離識有法理不相應授記經中作如是說當知識心徧一切法十地經中作如是說色法無實不可取捨那釋俱梨經中作如是說若了諸法性即非智所知是故此中無實可得智體無實當知如幻諸經教中作如是說諸菩薩者隨諸相轉是相無實義無所得勝義諦中言不可立寶雲經中作如是說若本是無不可言有識離分別名不

可立彼勝義諦真理離言而諸物性實無所得此如是說是決定語佛所說意破諸無智現愛經中作如是說若言有物是爲空者衆生業報應有染淨若有染淨即是有作若有所作即種種相隨世間轉有相轉故見有所成若能安住無顛倒想即知物性無別實體此如是義者慈氏菩薩問世尊如實說我本無邊菩提亦無邊菩提無邊故無菩提可得我無邊故無求菩提者亦無少法是智所知唯諸佛智而能照了彼真如法即是無性無性即是如來如來者即是無生性星一毘鉢多設多經中作如是說彼一切法若說言有此爲常語若執爲無即成斷見若非有非無又中間不立寶星經中作如是說貪等煩惱一切染法若解脫者是無盡相若能了知煩惱自

性本來清淨勝義諦中脫無所脫若欲真實觀如來者當觀如來解脫所生不從因生不從緣生非有相生非分別生遠離一切名言差別非色相非色真如乃至非識相非識真如非晦非明非即非離非見非知離諸識法非所了別不於一切識法中住若能如是觀如來者名爲正觀若他觀者名爲邪觀以邪觀故彼不能見如來真實此中所說如實義者離有離無非性非無性如是名爲真見如來無垢稱經中作如是說華嚴經中有一天子問妙吉祥菩薩言云何實語不實語一切煩惱云何調伏妙吉祥答言如人夢中見彼大蛇是人雖見非毒所害煩惱雖生而無實性是性清淨而自調伏此爲實語非不實語又海慧菩薩問不思議梵天言法本無證及

無所說云何有佛及諸佛法不思議梵天答
言若佛如來出興於世及彼演說諸佛法分
若有若無本自如是本來無說亦無所證無
說故無聞無證故無得但爲衆生煩惱業生
諸果報性引生諸佛大菩提心住諸菩薩悲
心境界若諸衆生煩惱等性能自調伏所有
諸行而不常行無求無願彼煩惱性悉清淨
者諸佛亦復無證無說又善財童子言當知
諸法皆悉如幻我於幻中而求解脫如是等
義華嚴經說當知諸法如幻如夢如陽焰如
星一
聚沫如乾闥婆城三界一切法從識心所生
心如幻故三界如幻若有一物有實體者此
說幻喻理不相應三摩地王經中作如是說
如上諸義諸經中說
復次我今依經略釋餘義如妙吉祥菩薩言

菩提者不可以身得不可以心得若無心即
無身身心離故無爲無作如幻如化若如是
說爲菩提者諸佛說此是爲菩提能入諸佛
平等境界是故乃可名智莊嚴而不莊嚴彼
一切智一切智性不可得故菩提無生亦復
無滅不一不異非此非彼諸佛如來咸作是
說又復譬如世間一切種子而能生長一切
芽莖若無種子芽莖不生釋迦菩薩坐菩提
場成等正覺其義亦然但從緣法而生起故
雖有所證而無其實此即說爲遊戲神通是
故當知無有外法諸佛如來亦無有性是故
離識實無一法若離識者法不生故若心能
生心即無生若法所生法亦無生以是義故
諸佛如來於無生心中說菩提義佛說識心
能生菩提亦非識心而能生故何以故識性
星一
五

空故妙吉祥所說是最上真實於自佛境界中如實而說又復諸法皆從緣生而彼所生亦無自性是故諸法皆悉如幻如幻之言是如實說慈氏菩薩現住如幻三摩地中是故世尊於是三摩地中與授其記爲表示故又復世尊於無數經中宣說諸法從識所現離生離滅非有相非攝藏無起作無止息不有不無非常非斷當知智性皆悉如幻況復諸法有所分別若有執著斷常語者彼非正行佛不許可若知諸法非斷非常彼正相應說名真實於自分外無法可著亦無有法是心所對雖於諸法說種種句但隨諸法爲表了故當知自識而非他識於其外義而無少法所可樂欲自識無性他識無性於自於他亦無異性彼真實智離有離無當知我識亦復

非有補特伽羅蘊語所攝是故應知一切佛一切法皆自分有若離自分求不可得即此所說離有離無是甚深義諸佛皆說此微妙法遠離一切取著分別離此亦復無別所說諸迷謬者若著於有即有善惡界趣二種差別若著於無即無其想利那生起是故著有著無俱不相應諸佛如來悲心方便宣說此義謂一切法離有離無如是所說是最上句是故此說諸法真實法無著性非諸所觀彼無著性離有離無若如是知是大智者當觀虛空無增減無分量無邊際即此虛空出生一切清淨識心亦復如是此心無心一切出生又如淨摩尼寶彼無心故映現一切或有問言云何分位而無能取應如是答謂彼虛空無作邊故即無能取若彼虛空無作邊者

量云何得當知一切衆生界如微塵聚彼一
虛空悉能容受而諸衆生等虛空界無所增
減若一切有情及一切方分一切種類一切
形相一一分別是中實無一性有所生起以
是義故非一性非多性一多中間而亦無性
若言一性定有所得即種種性而有差別有
差別性即分別生是故一性多性是性平等
若於外義無所取著於智亦復而無所得若
於外義無所取著於智亦復無所生起若知
識心離諸有相而彼外法有何分量若知識
心是諸有相而彼外法亦何分量是故應知
於彼外法實無一性而可生起如夢等法無
實作用若言諸法是此此無自相若言諸法
是彼彼亦無實若於自心有所了知即此自
心亦復無實若如實知者名覺了識相若有

一切麤重分別心起當知皆是煩惱差別所
生若能了煩惱性離分別心即生死涅槃二
俱清淨此清淨性即諸法性是性亦復名爲
眞如名爲實際亦名爲空是諸性中若染若
淨實智所觀皆悉平等或有問言於一切法
中何者是不壞應如是答諸法自因不壞云
何不壞不壞因性故若法有性若法無性不
離自性於二義邊何能安立若諸法因及諸
作用有所壞者於一切處理不相應諸法實
性云何隨轉謂彼實性無所住故諸法無性
云何有因離因亦復無別性故又諸法實性
而無所壞即壞之名亦復無住此中亦無差
別因性彼壞滅性無分位故諸法眞實是常
住性彼常住性非無常性若離實性別義作
用理不相應然諸物性而亦不滅又非無常

性是真實性真實性中而有何義是所作用無差別性不可分別彼一切常徧一切處又非無常性是真實性真實性中相云何得諸不真實此云何立諸別異性此云何現是故非無常性應如是知亦復當知無常性者於物性中自類而轉聚類所現差別因故所欲爲因而生起故若或以彼諸無常性而於此中爲決定說與唯識義理不相應彼無常性無決定故若法不壞亦非不壞有法剎那而生起故若言不壞者何名無常性若非不壞者又何名因性過去未來法亦如是皆無物性定實分別諸法隨轉隨其分位此復何因謂無住故諸有爲中現前事滅即彼後事還復生起前不可分別引生後分後不可分別從前分生若言諸法此有所得即於此中起

分別因若言諸法彼有所得即於彼中起分別因過去未來無住亦然是中不應有所分別剎那法中可說有壞不壞義邊非剎那法若於彼因如是了知前後中際不可分別集諸法寶最上義論卷上

星一

八